

四庫全書

集部

欽定四庫全書

集部

燭湖集卷

一至三

詳校官庶吉士臣吳烜

主事臣呂雲棟覆勘

謄錄監生臣黃維

謄錄監生臣范重祿

欽定四庫全書

集部四

燭湖集二十卷附編二卷

別集類三 宋

提要

臣等謹案燭湖集二十卷附編二卷宋孫應時撰應時字季和自號燭湖居士餘姚人登淳熙乙未進士初尉黃巖遷海陵丞再遷遂安今改知常熟縣以倉粟流欠貶秩移判郤武軍未上而卒考揚簡作應時壙志及張湜

會稽續志均稱其紹熙初嘗應蜀帥邱密辟
預料吳曦逆謀白密以別將領其軍後曦以
叛誅其言果驗時應時已歿三省奏官其子
祖開蓋亦智畧之士又史彌遠受業於應時
集中與彌遠諸書皆深相規戒迨彌遠柄國
超然自遠無所假借甘淪一倅而終其人品
尤不可及矣宋史藝文志載燭湖集十卷據
應時詩中自序蓋嘗應劉克莊之求手編其

藁為五十卷集末有其姪祖祐跋稱涑水司馬述先以十卷付梓後付以問思錄五十條通鑑摘義三十條總名之曰經史說又附雪齋父子倡和詩及雪齋行狀墓銘揚簡所撰壙記會稽續志小傳子祖開補官省劄等篇是十卷為祖祐所編非其舊本也年遠散佚久無傳本故厲鶚作宋詩紀事僅於吳禮部詩話王應麟困學紀問黃宗羲姚江逸詩內

採掇數篇寥寥不備茲從永樂大典所載排纂成編惟經史說殘缺特甚僅存一篇其餘則約畧篇數殆已十得八九以卷帙繁重分二十卷仍附編其父介及其兄應求應符詩並錄應時父子誌傳行狀子祖開補官省劄諸篇為上下二卷應求字伯起嘗登鄉薦應符字仲潛所著有歷代帝王纂要二卷初學須知五卷載於陳振孫書錄解題今並未見

云乾隆四十六年九月恭校上

總纂官

臣紀昀

臣陸錫熊

臣孫士毅

總校官

臣陸

費

墀

原序

國朝人文之盛列聖涵濡逮熙豐元祐間伊洛諸先生
出焉其於發揮洙泗微言可謂至矣高宗宏濟大業首
崇經術天下舉知儒道之貴孝宗稽古好學敬事元老
天下益知師道之尊聲應氣求師儒輩出若南軒張公
象山陸公晦庵朱公東萊呂公皆以斯文自任燭湖孫
先生早承學於象山晦庵之門天分既高學力尤至窮
理盡性深探閭域四方之士翕然景從凡經指授隨其

才品有以自立淳熙甲辰史忠定王延致先生講道東湖今丞相魯國公昆弟實從之遊述獲在執經之列丙午歲先人宰海陵先生適丞是邑尤得朝夕侍左右遐思渠鑪尚有遺文諸家藏得已會粹者十有二卷敬錄梓以惠後學述在海陵時嘗升堂拜雪齋老先生見手編家庭唱酬集父子兄弟自為師友讀之使人起敬是歲雪齋有賞月詩先人與述兩兄亦相與賡韻感念疇昔閱四十載唱酬集有遇雪鬻田二詩乃先生齟齬所

作因併賞月詩撮十題刊於附錄之末既以表先生幼年識趣之偉又以見雪齋源流之可敬也述不肖安敢效李漢彙昌黎文而為之序姑序次刊集歲月紀於卷首云寶慶丁亥長至日門人涑水司馬述謹書

--	--	--	--	--	--	--	--	--

欽定四庫全書

燭湖集卷一

宋 孫應時 撰

表

慈福太后加上尊號賀皇帝表

聖治重光侈璇宮之錫美慈闈備福新寶冊之揚徽奉
縟禮於中天偉閔休之冠古中賀恭惟皇帝陛下祇承舜

孝適廣文聲履揖遜之昌圖輯聖明之鉅典於皇帝社
盛三宮燕喜之時仰止坤元大八秩壽康之慶肆洎穀

全
卷一
旦登衍鴻名極榮養於東朝永延洪於奕世臣身縻外
閫迹遠修門揚厲鋪張莫預千官之末議詠歌舞蹈徒
切四表之歡心

賀壽皇聖帝表

嗣聖總師祇廣舜心之孝重闡奉冊丕昭文母之尊煥
緝典於叢霄施閔休於區宇

中賀

恭惟至尊壽皇聖帝陞

下仁深與子道盡事親置酒未央踵十年之榮慶問安
長樂新八秩之壽康茲蒐舉於上儀益光華於疊矩動

龍樓之喜色沸鼇極之歡聲臣身使蜀門心馳魏闕親
逢盛事亶千古之一時嘉與遠民共三呼於萬歲

又

今古一時莫盛慈皇之事母國家多慶誕聞聖子之生

孫喜集叢霄榮均廣宇

中賀

恭惟至尊壽皇聖帝陛下循

堯盡道命禹執中決宇宙以歸仁備天人之薦祉龍樓
就養已欣付託之無憂甲觀發祥更卜繼承之有永神
民呼舞宗社奠安臣身使蜀門心存魏闕不惟盛事遠

超載籍之五三益願慈顏坐閱來昆之千億

皇孫生賀皇帝表

玄圭繼治赫帝業之流光神劍告祥挺孫枝之毓秀福

全五世喜浹四方

中賀

恭惟皇帝陛下遠績禹功率行舜

孝重親悅豫躬大安長樂之朝世嫡蕃昌新甲觀畫堂

之慶亶天人之嘉會軼宇宙之前聞遙知三日之親臨

想見五雲之佳氣有室大競無疆惟休臣遠去駕行阻

陪虎拜流傳盛事實欣千古之一時鼓舞斯民同祝三宮

之萬壽

代史魏公賀皇孫出閣表

帝祉鴻濛奕葉昇皇家之慶孫謀燕翼異宮開世嫡之

尊盛事難逢函生胥悅

賀中

恭惟皇帝陛下率履堯道紹

新周邦雍雍慈孝之傳蟄蟄繁昌之緒含飴弄膝前知

映日之精神賜服班朝喜見成人之禮樂爰疏恩於甲

觀俾開府於禁垣光昭萬世之規丕對三宮之訓臣身

雖謝事心敢忘君欣聞國家典禮之行敬為宗社安榮

卷一
之賀

會慶節賀表

宅位倦勤高蹈清都之表大德得壽增多神筭之元仰
慶旦之虹流溢歡心之鼇抃中賀恭惟至尊壽皇聖帝陛
下仁如天覆道與時偕法度循堯底繼承之盡善歷數
命禹知付託之無憂龍樓臨五日之朝鳳紀屆千秋之
節合三宮而式燕駢衆福以來同臣早濫周行新蒙蜀
寄想望未央之前殿雖覺岷江萬里之遙竊與青城之

老成同上嵩嶽三呼之祝

又

祥開虹渚適當盈月之期慶溢龍樓丕衍後天之算三

宮式燕四表同歡

中賀

恭惟至尊壽皇聖帝陛下德配兩

儀道超萬古循堯繼治巍巍其有成功命禹執中恢恢

無復餘事履大安之至養奉長樂之慈顏方將紀八千

歲之春秋為億萬年之父母屬臨慶節益茂宏休臣濫

使遐方欣逢盛際玉卮在望莫陪漢殿之羣臣芹獻不

金史曰乃合三十一
卷一
忘但効華封之三祝

又

生商運啟日月會析木之津戴舜心同麟鳳舞簫韶之
奏當玉卮之稱壽想璇極之增中惟賀恭惟至尊壽皇聖

帝陛下道與時行仁如天大倦法宮之事詔游姑射以
神凝集四世之全榮冠百王之景鑠流虹繞電屬天人
嘉會之期就日望雲均臣子愛君之意臣綴班奎閣將
指坤維尚想駕行聞九霄之警蹕敢忘虎拜歌萬壽之

聲詩

賀光宗皇帝登極代司馬通判儼進文正公奏

劄表

葵藿無情猶知向日蟻蜂有悃能不忘君矧濫齒於衣
冠而久蒙於祿秩拊躬抃蹈際運休明三聖相傳信千
古未聞之盛六龍在御當萬物咸睹之時加以言路宏
開封囊交上雖慚應詔之奇策竊貢承家之舊聞內激
愚衷死有餘罪

中謝

伏念臣曾叔祖臣光見推一代受任

累朝每懷入告之嘉猷自信生平之力學蓋嘗以曰仁
曰明曰武為君人之德以任官信賞必罰為政治之規
自仁廟英廟之疇庸逮神宗哲宗之訪落始終六說懇
切一辭然九重不謂之迂䟽而四海咸稱其忠蓋巍巍
底又往往由茲曩者臣兄假以州佐之微官逢壽皇之
初政用騰奏藁進徹宸聰曲荷并容俯嘉狂狷恭惟皇
帝陛下祇承內禪適濟中興若稽本朝之憲章追想當
時之耆老曾是先臣之獻替久塵乙夜之覽觀臣實無

知懷不自已敢緣故事特寓微衷忝謂世家久已厚乾
坤之雨露庶幾後裔猶能增海嶽之涓塵惟無忽於常
談斯立觀於實效所有先臣光前件劄子四道謹繕寫
隨表昧死以聞

重明節賀表

為天下君赫乾坤之眷命祝聖人壽均臣子之至情瞻
盛旦之虹流溢懽心之鰲抃中賀恭惟皇帝陛下嚴恭寅
畏緝熙光明成禹萬世之功興舜九招之樂三宮四世

方永保於歡榮百姓羣黎悉陶成於仁壽於皇嘉節滋
受宏休臣遠迹周行分符蜀土望天顏之玉晬阻奉宸
歡占歲事之金穰併為國慶

又

地闢天開丕赫離明之照虹流電繞亶臨震夙之期沸
率土之歡聲永皇穹之休命中賀恭惟皇帝陛下道傳精
一功格平成視膳問安仰盡重闈之養垂衣拱手俯觀
萬物之寧星明南極之躔神授泰元之筭允茲慶旦丕

擁宏休臣叨被明恩遠將使指難趨漢殿進都護萬年
之觴嘉與蜀民致封人三祝之意

又

身縻萬里忝西清學士之班節過千秋慶南極老人之
見仰致後天之祝俯殫報上之勤臣聞作善而降之祥
大德必得其壽於皇上聖出應昌期恭惟皇帝陛下天
錫九疇躬行一道總章衢室不忘堯舜求賢之心長樂
大安遠過漢唐事親之孝是增神筭以永帝齡臣遠去

金史卷一百一十一 卷一
鷓行阻陪虎拜金莖沆瀣惟願奉萬年之觴玉殿果臝
徒想聽九霄之蹕

代邱制帥謝賜曆日表

寅正得天宣在躬之歷數昕朝頒朔通薄海之車書爰
敕庶邦以興嗣歲中謝恭惟皇帝陛下繼舜一道叙禹九

疇察治象於璇璣凝聖功於玉燭折因夷隩庸敬授於
人時東西朔南方大同於聲教臣夙浮江漢來使岷嶓
初布詔條恭逢驛賜自天而下仰星辰日月之旁羅與

物為春慶草木山川之咸若

牋

賀慈福宮牋

福盛東朝極兩宮之敬養慶鍾甲觀全五世之歡榮

中賀

恭惟壽聖皇太后殿下德啟姒任名光馬鄧聖而繼聖
萱庭素釋於憂勤孫又生孫椒劄坐觀於蕃衍坤儀所
鎮帝祉滋多臣荷國厚恩逢時嘉慶含飴弄膝想知霄
極之怡顏奉冊稱觴尚見雲初之列侍

賀壽成皇后牋

思齊之助浹燕喜於三宮長發其祥見蟬聯之五世畫
堂毓秀慈闈增輝中賀恭惟壽成皇后殿下儷日竝明配
天不老媚自周姜之婦格有王家施於洛誦之孫生蒙
帝祉榮超古昔福萃宗祧臣夙荷國恩遠違朝蹟叢霄
在望惟祈萬壽之無疆盛事難逢敢後四方之來賀

賀皇后牋

六宮治內重光彤史之傳五世全榮俶奏畫堂之慶福

扶廟社喜浹方維中賀恭惟皇后殿下莘女篤周塗山興

夏徽音是嗣惠宗公以御於家邦景命有開釐女士而
從以孫子厥鍾世嫡其對天休臣叨際昌辰欣聞盛事
祝釐朱邸更符榴子之多垂裕皇基用卜椒條之遠

狀

代請龍圖閣學士左通議大夫致仕胡沂謚狀
臣等輒瀝血誠仰干宸聽蠅蝨小臣自揆孤遠籲天有
請罪當誅戮中心震懼不敢逃死伏念臣先父龍圖閣

學士左通議大夫致仕餘姚縣開國子食邑六百戶賜
紫金魚袋贈宣奉大夫臣沂奮身儒素遭世休明粵乾
道七禩當陛下肇啟東宮壽皇聖帝屬意耆德俾職端
尹惟先臣實與故從臣王十朋陳良翰周操首膺妙選
時論翕服先臣初以前吏部侍郎權尚書召還專領是
官已乃除給事中至禮部尚書隨所遷官皆命兼領是
以密侍東宮之日為最久蒙被引遇之禮為最優自是
不與他比後三年丐歸得請除龍圖閣學士奉祠還里

不幸奄先朝露遺奏既聞贈宣奉大夫臣等不肖欲以先臣本末事實上諸太常請賜易名之典於朝伏緣在法官至光祿大夫始應得謚而先臣尚隔一階未敢冒陳重以先臣身後凋落臣先兄拱學行粗有聞於時今太師史浩同知樞密院事葛邲皆嘗論薦忽復早世不得少見教忠報國之效臣等碌碌沉綿憂患有懷歷年茲者千載幸會恭值皇帝陛下光承揖遜繼舜登極恩覃薄海遠近驩洽乃若宮僚舊臣尤悉獎記

寵光赫奕振於前聞臣等竊自感慨先臣夙昔遭際在
諸臣先天不假年莫瞻慶旦獨有飾終一事尚當乘時
望賜為泉壤榮上惟至仁如天不遺小物俯矜民欲萬
有一可臣等苟不剴切陳露乃是自絕於聖世兼臣又
睹著令諸官不應得謚而聲稱顯著者亦許定謚前後
故事尤多此比再念先臣幼為宣和諸生險阻艱難義
不忘君洎登紹興甲科復值權臣用事恬處選調踰二
十年中居言路排抑貴倖發於忠愛晚預論思特受

壽皇聖帝知遇天語慰藉每有忠實不阿附之褒至於
士推大雅世載清德束髮終老不見玷缺恭惟聖明委
照毋俟縷陳臣等是敢妄意令文所指不勝人子區區
顯親之心上叩帝闈俯伏待命伏望皇帝陛下興懷往
舊滲澤幽潛特推非常之至恩兼昭勸善之殊典使先
臣蒙一字以不朽則臣等雖萬死而敢辭所有先臣行
狀謹繕寫成冊隨狀投進欲乞睿慈降付有司特賜定
謚施行臣等無任瞻天望聖激切屏營之至

到闕與侍從先狀

領藩護塞久愧東垣之民賜詔解符亟趨北闕之覲冀
言遂於朝事將造覲於高堂獲序感藏仰依休庇敢馳
緘牘敬達記曹惟蘄寬仁先恕崖畧

又

東垣護塞再易於歲華北闕賜環行瞻於霄極佇接鷺
班之後綴因望鳧舄之前約併導素誠少紆勤想敬馳
緘牘先達記曹

太守入境與文太師先狀

比者謹交印紱爰整羈鞅崎嶇初出於關中繾綣已懷
於洛土望輝光而在邇馳悃幅以良勤抃懌惟深編摩
罔究

賀范提刑交馳狀

疏恩天上改使漢中世祚益光官襲榮公之舊鄉關未
遠地忘蜀道之難茲授任之實宜於遠嫌而何有伏惟
某官以家學之正大輔天資之英明闊步一時希蹤諸

老當年聯璧人稱二陸之俱來今世一夔天俾明公之
更達業登華貫勇退急流未嘗忘許國之忠是以不擇
地而處輟梓潼之撫字勞劍北之將輸曾坐席之未溫
復抗章而自列肆膺天詔改駕星軺受王嘉師監祥刑
上非輕畀以古法議決疑獄民用不寃行矣賜環歸其
持橐某謬叨重寄實賴同寅幸勿遐遺益勤忠告吾二
人之心事當不啻於弟兄公四世之典刑終有辭於家

國

與夔路趙安撫交馳狀

蜀兼四道故唇齒之相依夔控三巴抑襟喉之尤重竊
將吾儕之協濟共寬明主之顧憂况平生所聞一時人
物之英乃今日同好萬里山川之外問津不遠傾蓋可
知伏惟某官文名四方義概千古山立不倚玉全無疵
騰輝使星晉位郎宿推轂北戍易符西征雖出入遠近
相尋於十年而心迹本末可考如一日藹然士論簡在
帝衷赤甲白鹽寧久淹於嘯詠黃扉青瑣即歸罄於論

思某志與年凋才於用短謬將隆指來牧遠民內憐事
力之未蘓外恐羈縻之無術何幸十連之合治先聞五
袴之興謠得借餘光更蘄忠告瞿唐灩澦行當謁東道
之主人汶嶺峨眉端不減右軍之奇事詞難縷縷意極拳
拳

賀瀘南郭安撫到任狀

詔從真館寵畀雄藩壯韜鈴戟燾之威新壁壘旌旗之
氣羣心自定方面底寧忝聯治以為榮實分光之有賴

恭惟某官家世名將朝廷信臣訓齊邊圉之貌貅軍聲
震疊彈壓天關之虎豹帝寵便蕃山林雖聽於少安廟
社不忘於倚重屬東川之謀帥發中詔以命公開府建
牙便已息潢池之警據鞍上馬尚期收瀚海之勲某自
笑踈頑亦叨臨遣所恃肺肝之無隱遂容唇齒之相依
左右挈提共修方伯連帥之職邇遐安靖庶答聖君賢
相之知

答新成州宇文知郡子震狀

少年虎榜實忝雋游中歲駕行更深雅好逮今茲之頭
白知相見之眼明恭惟某官人物極高進用最早何脩
能之見忌逢積毀而遂踈念公卧家使我寤歎新傳詔
劄起畀守符雖云關外之偏州實亦國西之要地壯心
未折諒趣駕而不辭公論既開佇賜環之非晚迺如薄
質猥被殊恩才本無堪恐貽羞於蜀道心知有恃得問
政於鄭鄉願言握手之餘勿嫌提耳之告

謝劉守陞陟狀

受縣無堪幸當滿罷脫身是望何有薦論眷然華袞之
褻疑於藻鑑之誤再三自省十倍為榮竊念某少不如
人仕非所好為親黽俛與俗浮沈萬里行游恍蜀江之
夢寐三年坐縛媿偃室之弦歌文書眩而目昏心慮煎
而髮白賴逢賢牧來布寬恩清獄訟而田里安輯神人
而年穀熟公私之務益簡上下之情易通故盤根錯節雖
無利器之可稱而凌雨震風則有廈屋以為庇苟終更而
得去真受賜之已多豈伊鼠技之窮乃昇鶚章之寵性質

中下顧明敏之何居吏事尋常謂䟽通而猶未感公厚
意撫已汗顏伏遇某官鍾玉筍之精神富墨莊之文獻
以此閱天下之士一見莫逃而獨存古人之風不求自
與遂令孤戇亦借品題某敢不補拙以勤敬終如始但
憐鳧鳥難如葉令之僊飛猶恐龍門或玷李公之容接
更惟矜念早遂保全懇謝之私形容難究

謝虞提刑陞陟狀

三年試劇惟依六轡之光一旦受知足增九鼎之重未敢

言尺寸之進實已倍尋常之榮伏念某門冷如冰家窮
至骨閉戶映雪少而讀父之書漱石枕流本無干世之
念苦緣升斗浪走西東天日一心星霜再紀常恐食焉
而怠事其禍莫逃若云私爾而忘公則吾豈敢雅不善
於覓舉非輒求於自高偶然從萬里之招遂亦換七階
之選得邑於此為計更踈犯天下之所難取衆人之共
棄膏火煎熬而髮白風波洶湧而迹危不意自全適有
天幸久寬銜勒免於百謫之盈終賜齒牙眷然一顧之

寵知憐異甚觀聽駭然茲蓋伏遇某官當代宗工為國
膚使閱人之鑑如月比士之履若山駿明雖惡不廢於
一言即墨可封無間於多毀且使四方知不得罪於君
子庶幾他日或能自及於古人某敢不洗濯塵容激昂
素節百里半九十儻善後之可期一身當三千尚酬知
之未晚

謝浙東張提刑詔闕陞狀

吏役亡堪甫及三年之課使華所暨猥加一顧之榮睽

知己之難酬懼薦賢之非稱敢陳平素以瀆高明伏念
某圭竇寒生辟雍晚學雙親白髮方謀菽水之供一命
青衫敢憚塵埃之役間闌巡徼鞅掌簿書羈危幾類於
五窮齟齬殆盈於百謫竊守父兄之訓重聞師友之箴
妄意古人戒蓬心之不固委身時運悟蕉夢之俱非紛
進取以安能獨迂踈而自笑淒涼江海俛仰星霜方哦
歸去之詞欲尋遂初之賦忽聆使節躬按遐陬攬轡登
車既免澄清之及下堂携手遽叨論薦之先曾非意料

之初迥出尋常之外茲蓋伏遇某官資文武忠孝之德
達詩書禮樂之原白日青天皦若襟期之素清冰寒露
自然風鑒之高名家百年早膺帝眷銜命萬里蔚為國
光釋州組於淮堧分使臺於畿甸六條問事七郡向風
汲汲人才恐負九重之寄恂恂禮貌俯咨一得之愚謂
朝家選舉之科實銓曹進退之本酌權衡而自用洞毫
髮以難欺爰拯頽波以扶公論遂使守株之士初無躍
冶之尤華袞蒙褒措紳興歎某敢不益堅夙志思勵遠

圖桃李春風或詫公門之盛松篁晚歲寧忘國士之知
謝越帥王尚書希呂闕陞狀

遐陬試吏仰末照以自安會府薦賢潤餘波而下及退
省泥塗之陋顧塵風裁之高非分所蒙雖榮而懼竊念
某天資底滯人事濶踈守父兄之樸學而錮其愚習師
友之緒言而膠於用擁書自嘆徒妄意於古人拊已自
知亦何取於斯世悵田廬之無有曾菽水之不謀猥以
諸生進於禮部上汙衡鑿謬齒簪紳復久逃於空虛亦

竟忘於贅謝低徊巡徼怵迫簡書草澤漁樵作封丘之
清夢江湖歲月愧彭澤之高蹤粵聞帥轂之東雖喜師
門之舊雲天勢遠榮戟難依燕雀情卑緘滕莫訴託幘
幪之甚大寬箕楚其已多云何駑散之流忽畀鸚書之
重所施過甚自視恍然茲蓋伏遇某官宗社名臣乾坤
間氣垂紳入侍朝廷增九鼎之安授鉞開藩京師蒙千
里之潤紀綱一面襟帶列城居天下之望而寬以待人
位方伯之尊而急於下士明足以周庶物之情偽大足

以器羣生之短長雖是瑣微盡從甄別原選舉之初意慨
風流之久衰權門為之摩肩市道幾於攘臂焚焚至此
耿耿何言敢圖後生復見前輩冶金不躍寒谷自春洋
洋乎愛樂人物之心表表焉扶持善類之力慙所取之非
稱尚有傷於至公敢不砥礪前修激昂壯節流行坎止
聽造物之何如松堅玉剛庶酬知於未老

答單侍郎到狀

撇漩捎瀆纔脫巴江之險捫參厯井更知蜀道之難喜

漸近於平川得首觀於會府恭逢法從之重暫領价藩
之尊舊容接武於朝紳今幸分光於隣燭資糧扉屨不
敢煩東道之主人風物江山尚畧訪南樓之故事有懷
欣遡莫罄形容

答漢州張大卿到狀

平生蜀道之難今其飽見咫尺房湖之勝遂欲往遊况
黃堂之主人乃白頭之舊友更思一面容寫寸心屬冬温
之異常懼天意之當戒將齋心而致禱爰便道以遄驅

無煩五馬之郊迎以為民望空復雙魚之踵至有媿前
言

回東路王提刑先狀

撒漩捎瀆飽見巴江之箭急捫參歷井更知蜀道之天
難喜漸入於平川行少休於倦鞅惟時膚使繫我故人
新撫南瀘之師方還東梓之治想聲光之在望慨會合
之無從而深眷不遺惠言相命乃勤玉節特駐金淵其
於見君子之心云胡不喜如必設大賓之禮則不敢承

回朱都大到狀

初沂下牢凜撇漩捎瀆之險載驅南浦飽捫參厯井之
難幸川途之漸平知官次之不遠敢申聯事之好預刻
見賢之期自省頭顱定慙珠玉之在側惟應臭味便作
芝蘭之相投欣悚之私話言難究

迎文太師到闕狀

側聽德音瞻思國老謂夙欽於勲望故渴見於儀刑詔
使旆以屬途慰邦民之延首炎暘貫序勉馳鞏洛之郊

飛蓋凌風佇邇宣溫之戶某式虔在位阻候行郵伏惟
上為廟堂益調寢饒

迎文太師入覲狀

伏審肅颺台旆來覲帝廷寤寐粹容即奉清閒之燕馳
驅大道罔弛次舍之勤屬春律之始和諒福襟之深固
側聆車馭將屆郊圻佇遂覲瞻預增欣抃

迎韓相自洛西由闕判北京狀

伏審肅馳大旆肆覲路朝都民擁道以言瞻宸宸注懷

於來見矧惟幕屬之舊尤佇衰衣之還方冒沍寒尚覲
行色冀頤寢興期介禧祉

迎范戶部狀

伏審顯膺名節入覲嚴宸解全蜀之冰符臨西秦之驛
道隼旟抗路將覲騶鳴星弁盍簪佇聆燕語緬惟春陽
偃薄福履冲安方筮轡之尚勤冀興居之益護

迎蔡相自裕陵還闕狀

伏審竣事西陵還轅北闕祇奉祠於虞幄行稅鞅於都

闔即遂瞻承良慰傾佇

迎韓相入闕召以南郊陪位狀

伏承顯膺嚴召聿相大祠渴舊德之儀刑留精衷之寤寐都人屬目共瞻車馬之輝光烟燎陪容佇接珩璜之步武末階覲覲預切忻翹

迎鄭資政狀

伏承飭行自蜀修覲還朝旋聞日刻之來繼有宮祠之請雖燕安自便聊適於雅懷而傾矚攸同未厭於輿誦

念山川之眇邈丁暑雨之淹延跋涉良勤遵頤曷若輒
寓誠於簡牘庸申敬於記曹其在詠思并留前叙

迎李戶部狀

伏審顯膺召節入覲嚴宸解全蜀之大藩臨西秦之周
道抗搖搖之旆將憇於近圻觀兩兩之符佇被於華采
緬維福襟冲裕使騎勤煩爰冒秋炎尚屆館傳即詣迎
謁預切瞻翹

迎張宣猷狀

遠驅台旆甫次國都朝論具依上心虛佇阻於官制莫
遂郊迎冀趨命之勿違副瞻風之已久

迎周漕使狀

伏承遠馳台旆俯及嵩郊屬時霰之紛零冒驛途之
凝洩竊惟行李倍想艱勤某限官守之有常阻畿封之
納謁冀加調護副是依瞻畧布柔函仰通典記

迎呂龍圖知太平州狀

伏審肅馳戎旆將屆府城惟茲跋涉之勤尚冒炎歊之

末想惟妙養无爽太和即遂參迎庶殫蘊幅更祈保佑
益副翹誠

迎程參謀狀

肅驅大旆將次郊坰顧慕義之無從喜瞻風之有便恭
惟某官英才經世遠畧過人仰膺當宁之知出任臨邊
之寄折衝禦侮坐肅蠻方第賞策勲徑躋法從掇承休
於詔檢用參決於籌帷行奉湛恩入居近弼某曾移書
之未果忽枉教之先臨悚佩兼深敷陳罔既

迎呂秦州狀

伏承改帥西秦解符舊陝歷關河之阻將及於雍郊均
牛酒之歡暫追於里社竊惟勤勞華轡偃冒風埃德履
保和道襟集祉某佇諧迎晤冀釋瞻翹倍祝養頤下符
依仰

回楊總領賀冬至狀

天旋愛日當圭景之丈三地隱輕雷在著爻之初九惟
德受祉與陽俱亨伏惟某官順履嘉辰導迎協氣觀臺

曉望已占嗣歲之祥寒谷春生益茂宜民之福雖暫淹
於使節即歸捧於御床善頌之私報書難究

欽定四庫全書

燭湖集卷二

宋 孫應時 撰

啟一

發舉謝鄉帥啟

獻賦秋闈慙非飽學登名天府猥預薦書顧揣已以何堪實知恩之有自切以朝廷廣至公之路誠樂取於臺萊郡國有大比之常懼或遺於草野考其來之自古皆藉此以得人在周家則賢能俊造之賓興至漢氏而茂

異孝廉之歲舉無非本平生踐履之素是以成天下純實之風有如進士之名科號為後世之重選雖文章決一日之勝然規模亦三代之遺自唐世以相高迨國朝而尤盛竊觀前輩歷數鉅公宏才實學涵養於未試之先元勳偉節發揮於可為之日非若悠悠世俗之志苟遂區區利名之私士而未及於古人心豈無媿於茲舉矧今天子振非常之烈深詔執事求有用之才六經之學孰深造於聖門三策之條孰兼通於世務凡在持衡

之下宜無濫吹之容如某者詩禮家傳簪紳世舊念宣
獻以來源流學術之粹顧春明之望冷落艱難之餘銘
心願復於青氈束髮粗勤於黃卷慨餘風之未遠顧童
子以何能強習雕蟲敬出諸先生之後敢圖薦鶚乃玷
鄉大夫之知茲蓋伏遇某官為國近臣當今碩望解喉
舌中朝之任分股肱輔郡之憂適三年勸駕之時助九
重求士之切淬勵作成既出於尋常之外甄收簡拔不
遺於尺寸之長致茲光榮及於么麼某敢不力思遠大

深自激昂進所學於未能堅其志以有立階梯今日儻不墜先世之名鞭策他年亦以為門下之報

又

上公作牧亦躬勸駕之勞畸士應書僅齒登名之末羌衆雋之所笑抑有司之至明矧惟巖石之素瞻而使宮墻之自託是為徼倖敢不知榮嘗考周家致太平之端深識先王命鄉老之意夫貴為師保本非一職之可名而分總郊圻使董三年之大比出偕羣吏而舉賓興之

禮入見天子而獻賢能之書蓋道隆德駿既足以使人
才之向風事重體尊尤所以示朝廷之敬士邈中古之
既降喟此道之莫追郡之選舉幾於具文主者好惡或
其私意禰鴉抱卑飛之歎齊等多濫吹之譏孰如今茲
適有幸會屈衮衣繡裳之重為國求才使筭門圭竇之
人逢時自奮仰大公之在上知小善之必收如某者生
長窮鄉抱持樸學雖少而有志初非富貴溫飽之謀而
壯且益貧實有父兄門戶之責三年之鳴未振再鼓之

氣不衰忽驚鉛槧之生光不作陶鈞之棄物顧雕蟲篆
刻之技亦何足言然攀鱗附翼之途或由茲始茲蓋伏
遇某官三朝公輔一代宗師衣鉢文章五世襲為儒之
貴鼎彝事業九重深求助之思方虛左以迎歸豈居東
之淹久興懷場屋之際垂意權衡之間曾是妄庸及於
甄錄某敢不益加砥礪仰稱作成與計吏偕雖曰肩衆
人之下見大敵勇或能策第一之勲

又

家聲滿世忍負讀書之傳地著有年許從寓里之選曾
謂雕蟲之陋猥叨薦鶚之榮知振起之可期仰作成之
有自蓋聞唐虞三代之治所甚急者人才恭惟祖宗列
聖之心尤加重於科舉凡衣冠之胄子與韋布之諸生
各盡力其所長得乘時而自奮彬彬繼出卓卓可觀學
術議論能追數千載之淵源道德功名遂以扶二百年
之社稷肆今初政率由舊章渙發明詔匪為虛文風厲
名士俾為實學豈使齊筭之濫要求魯服之真如某者

涑水諸孫山陰北客念中朝之盛敢忘先訓之箕裘顧
南渡以來未睹世科之衣鉢喟夙宵之黽勉驚歲月之
蹉跎何獻賦之未工忽登名之誤及雙親一笑粗不為
燈火之羞小子自量猶恐作權衡之玷厥惟幸會有此
僥覲茲蓋伏遇某官事業格天文章經世三公為鄉老
薄頰袞繡之鎮臨一氣轉洪鈞共慶鳶魚之飛躍親為
勸駕俾與計偕無患有司之不明遂令小子之有造某
敢不激昂素志磨勵新功得雋南宮儻可拾青氈之舊

拜恩東閣正應歌赤鳥之歸

回京制帥賀交割啟

三邊重寄豈堪承乏之非才萬里遙驅賴有告新之善
政問知封境拜受印章思稱上恩敢違前躅伏惟某官
胷襟度世指掌謀王以彌綸宇宙之才先試於四路六
十州之間宜鎮撫兵民之效有光乎諸公二百載之蹟
盡洗岷峨悽愴之氣不驚江漢朝宗之波樂職宣布之
詩久熟諸生之誦出車勞還之雅式形明主之思馳溫

詔以如綸佇遑歸之補袞中朝政地方將繫天下之安危西土人情寧得計雪山之輕重某無能為役猥使代公適當見吏民之初何以慰父老之望固知蔣公琰之於諸葛不及前人庶幾任中正之繼垂崖悉遵成畫尚須一面庸寫寸心

上葉知郡啟

學邑非才持身受察煌煌祭戟之下凜凜簡書之明一郤一前為榮為懼蓋聞千室之宰孔門不輕許人四長

之賢漢世以為盛事官無大小責有重輕使天下無太平之時亦縣令非其人之故然而世變相激吏途多端文移旁午而交馳賦歛鑿空而取辦自簿書獄訟不及經意則教化風俗又何暇知加以位下權輕法弊情巧機穽難測風波易搖官民至於相視為仇讐郡邑不能交通如父子自非道足以獲乎上德足以長其人游刃肯綮之餘收功繩墨之外雖以高才而處此僅亦俗吏所能為如某者少無技能長亦迂濶驅馳升斗之養龜

勉塵埃之容不能犯當世之至難輒欲以書生而自試
捧檄趣成春糧遠征豈惟登車敗績之為憂正恐求牧
與芻而不獲獨欣天幸首事我公恭惟某官文獻承家
風流名世器博大而方厚識淵深而清明天府浩穰治
中名重山城瀟灑節制體尊固已謳吟一方襦袴千里
幸寬下吏之轡策使布仁侯之教條察其悃幅之無華
赦其遲鈍之不及誠殫千慮稍答萬分但恐帝方急賢
公且入輔雖則雲天之在望未知日月之何如堂下一

言固不遁知人之鑑歲終四善其敢干考課之公尺牘
有窮寸誠難究

與李制幹啟

讀蜀道之歌想見風采依嚴公之幕辱為輩流不孤萬
里之遠遊真成一段之奇事恭惟某官星精孕秀月窟
騰芳滔滔岷江之詞源峭峭石笋之風骨固已陵轢多
士震驚一時而且畧無驕豪厚自涵養要窺從上聖賢
之實地不作隨世功名之近圖定非尋常所可量度蓬

萊道山之名人已遲之芙蓉綠水之居君寧久此不愁
黃卷之如律便看黑頭之作公某偶然來訪於魚鳧幸
甚獲陪於鸞鳳媿非孫楚不能為參卿軍事之高初見
李翱聊亦致得賢主人之賀渴湏面語款究心期

通成都陳鈴幹啟

聞名以來今幾歲月快睹之願巧相參商安知四海兄
弟之游乃在萬里山川之外締交云始寫敬敢忘伏惟
某官文妙穿楊筆健扛鼎激昂意氣早披黃石之一編

游戲詞章更中青錢之萬選多士辟易九重歎嘉屹為
將相之儲優俟功名之會小遨遊於賓幕雜談笑於邊
籌故嘗身行危疑反側之間坐收還定安集之效茲特
發硯之一試徑須推轂之九遷不對清光式殫素蘊某
連檣壁海傾蓋錦江豈行止之偶然何追隨之幸甚大
牀徑卧能毋媿豪傑之交閉戶讀書尚許聞切磋之益

回盧鈐幹啟

謝傳階庭之譽久熟聽聞嚴公幕府之遊適相先後交

一臂而不見搖寸心其可知伏惟某官天與奇才家傳
妙學十二樓之飛鳳文采何多九萬里之搏鵬功名方
起別巴山之枳棘弄錦水之芙蓉風流雍容論議英發
陪碧幢而入奏著綵服以歸寧能無好官徑壓餘子某
人品卑甚客遊偶然所期雲霧之披乃作參辰之避羣
賢共席空懷瓦礫之羞百過開函竟乏瓊瑤之報

回黃巖錢主簿啟

願識韓荆州竊有聞風之素一詣習主簿何如聯事之

榮欣奇氣之鼎來媿函書之先及恭惟某官家傳忠孝
之烈天與高明之姿政事文章不見全牛之迎刃風流
醞藉自然野鶴之在羣猗四海之幾人當一日而千里
紛簿書之細故與州縣之徒勞而屈大才豈厭輿論棘
林鸞鳳雖戢翅以卑棲溟海鷗鵬佇搏風而直上某一
官不效百謫且盈繫譴薄其自知處淒涼而何歎願事
大夫之賢者以訖其身而聞君子之至斯云胡不喜

回常熟趙主簿啟

自笑癡兒不了公家之事新聞高士肯為簿領之來天
實借之吾有助矣伏惟某官神明貴胄灑落英姿藏萬
卷於胸中掃千軍於筆下鶚冲秋漢方自致於功名鳳
翔景雲已亟蒙於褒表不辭棲枳之陋果趣戍瓜之行
祭竈請鄰聽嘉音之已近發硎游刃知遠業之難量某
漫浪平生摧頹多病茲強顏而試劇幸聯事之得賢尺
素有書便卜寫心於一見寸誠所望必無袖手以旁觀

上平江守虞殿院儔啟

一札自天雙旌易地花驄京路幾年真御史之名銅虎
守符三典近長安之郡肆陞華於堯閣爰增重於吳門
公為民而肯來人有喜而相合維今茂苑實古名藩燕
寢凝香文物見詩人之賦高臺臨遠規模猶故國之遺
矧自中興以來遂為三輔之劇夥舟車之繁會望金穀
之浩穰非屬諸有威風知大體之人或失夫治豪右牧
小民之意日舒徐於弄印衆想望於出綸厥煩我公大
慰物論昔焉耳目之任糾正百官今也股肱之邦師帥

千里儼風霜之清節布雨露之優恩是於彈壓撫摩之間必有光明俊偉之實以茲選任亶謂得人恭惟某官粹學起家高明華國平生亶亶要無毫髮之欺心孤立堂堂獨全天地之正氣踐揚多矣本末瞭然一辭觸邪之冠旋上行獄之節焦勞荒政恩波同霽水之長嘯詠公堂治象比婺星之煥凡緩急弛張之時當皆忠厚惻怛之所形視彼民之去思何吾土之多幸松江草木共知有脚之春來魏闕雲霄不礙舉頭之日近第恐興懷於

宣室便須持橐於甘泉則方喜而又憂願少安而無遽
某愚不諧世仕專為親紛邑弊之有年猥求自試凜地
寒之無與知必易危姑早夜以忘勞奚始終之敢計然
踈遠之蹤雖未有一日之舊而仁明之下定可託二天
之私將歛板以鳧趨真望塵而雀躍考歲終之四善則
不敢有覬心貢堂下之一言庶或蒙於携手

迎知嚴州冷殿院啟

平生聞義心願執鞭今日望塵職當負弩聽父老之相

語喜使君之鼎來仁聲先滿於一方協氣頻回於千里
古有是事今見其人竊以嚴維名州代得賢牧廣平公
之風烈凌厲雲霄樊川子之詞章粉飾巖壑爰及文正
最高本朝瀟灑十詩優游中歲留作桐廬之盛事出為慶
歷之名臣中興以來行闕尤近凡所選畀固多循良抑
由賦重而民貧未免水煩而土敝慨想前哲欣逢我公
伏惟某官名儒起家耆德高世青天白日不容一毫之
欺心和氣春風中函萬物之生意龍游之聲藉甚烏臺

之望凜然誰憎長孺之立朝坐小法免即俟次公之治
郡以異政褒必將疏剔細苛布宣寬大盡消愁恨歎息
之舊一收安靜和平之功公優為之民有慶矣某才極
下下意懷區區無可樂之簞瓢聊自試於民社非折腰
之敢憚顧掣肘之難為幸哉事賢可以達志受容受察
不待作河南尹之書載欣載奔庶免賡彭澤令之賦有
懷跂望莫究形容

與楊都大交馳啟

遙驅萬里俶分卿月之光申命九天就易使星之次均
是一時之重寄等令四蜀之蒙休至於衣繡晝歸早遂
過家之樂寶奎夜直不殊在列之榮時維茂恩請以重
賀恭惟某官英姿山立妙學淵涵風力局幹自冠冕於
當今聲名事業已權輿於大用勇作急流之退自請故
鄉之行北道宿師初仰計臺之給餉西山和市更資牧
使之得人上於信臣固無改命之嫌公於王事諒不擇
地而處肯眷錦江之舊少淹玉節之華佇宣室之興懷

即甘泉之入覲某側聆郵報喜溢襟期見天上之故人
當頓寬於衰病問里中之父老仍多惠於良規

謝執政啟

名著丹書尚噩風波之夢恩叨黃勅新諧香火之緣永
惟大造之至仁不忍小夫之失所拊躬增懼沒齒知歸
伏念某門冷如冰器頑弗琢早年教學目昏舉子之詞
章半世光陰髮白癡兒之官事然而衆紛紛其爭進已
望望而愈踈畧無意於自媒亦何名之可盜故一第二

紀之後僅脫選階萬里兩川之還靡辭邑戍猶云附黨
無乃傳虛至於治劇之三年竊亦盡心於百姓橫遭羅
織端有照臨久而卒掛於微文皆云可矣然且驟騰於
繳論意或使之公朝一付於無私薄命再鑄而何愠幸
歸蓬戶私詠蘭陔蕭條菽水之不克寂寞郊原之獨往
事益久而既定懷欲訴而尚羞姑妄意於祝釐忽迎門
而拜賜山川安在便如五峯雙練之游盃甌不空奚啻
一壺千金之濟是何特達出自矜存茲蓋伏遇某官文

武憲邦道德藩世謂國家方開大中至正之路所懲元
祐之末流而宮廟以待不才無過之人是乃熙寧之本
意矧於么麼夙所知憐念其前枉之甚明豈使盛時之
終棄肆從奏擬稍示洗滌某謹當省咎圖新祈福報上
收召魂魄已經虎口之脫身遊戲神僊敢思鳥爪之爬
背

回常熟曾縣尉揆啟

草木吾味占聯事之為榮金玉爾音愧騰緘之先及莫

酬嘉惠因寫素心伏惟某官挺修天倪叢芳世烈南豐
故篋江漢星斗之長存曲阜遺音金石絲竹之未泯英
風是似遠業可知誰云黃綬之低看即青氈之復某頭
顱四十手段尋常不辭治劇之難姑取養親之便計已
大謬悔將奈何賴有賢寮肯為我助一邑聯事正如同
舟之遇風二人同心勿效旁觀之袖手

上平江守劉宗丞啟

詔歸節旄寵昇符竹刺史高第補二千石故為卿相之

儲天下邦伯得十數公可占國家之福望浙河之星渡
覺茂苑之春回千里逢迎一時鼓舞伏惟某官以奕世
之家學為當今之國光經術詞章發公是公非之妙蘊
言論風旨熟元豐元祐之舊聞而其氣馥楚人之蘭德
粹和氏之玉澹林臯而自潔凜風露以彌溫徘徊蚤年
黽俛小吏單父之績既著海圻之歌繼聞乃班朝行極
慰士論平頒廩計簿正禮常鏤玉紀王宗之盟含香上
郎省之直仲山甫之明哲獨進退之俱榮范益博之澄

清亦始終之無撓維吳今日視漢扶風地望雄強民物繁會常重此選久難其人厥酬四牡之功來居五馬之貴蓋良吏之傳常觀其三輔之政儒者之用必先以百姓為心要無田里愁恨歎息之聲未妨池閣逍遙吟燕之樂祇恐賜環之遽不容暖席之淹某愚無吏能貧為親仕昧於劇邑甚矣拙謀深淵薄冰恐畏塗之不免盤根錯節何利器之敢言屬茲為隸之新不勝事賢之喜行百里半九十里實有小心人一天我獨二天竊深大

願

通支使啟

古廉車之設屬必選名流今幕府之在州端為上客有
來試邑何幸事賢望履不遐緘辭為贄恭惟某官器局
宏裕風猷老成接物春溫持身玉潔洞達時事深懷民
憂於以裨贊大邦表倡羣吏福被千里名聞諸公已看
鶚表之交馳會即駕行之趣入某才雖下下意亦區區
顧其不嫻於簡書何以自試於民社惟公府教條之寬

大而君侯心事之慨慷，俾率官常以安母養。紅蓮綠水方將歌，既見之詩，舊菊寒松，或可緩歸來之賦。

回漢州張少卿啟

鴈塔舊游，各駸駸於白髮；鴛行近別，竊耿耿於丹心。忽萬里以相從，想一麾之在望。有來雲翰，重歎風期；恭惟某官，學海老龍，詞林孤鳳，名滿一代，氣橫九州。飽更夷險之塗澹，無喜愠之色。遂煩北海歸鎮，西湖然惟門闌。三世所臨之邦，實為衣冠一時甚盛之事。定知撫字之政。

不肯鄙夷其民長使頌聲具傳方志旋入趨於宣室庸
徑上於甘泉某初乏邊籌謬將使指願持誠意以累故
人何以告之能勿替干旌之誼永為好也其敢忘木瓜
之詩

賀楊總領啟

詔選近臣出司外府若時宰士議以任漢公卿自請故
鄉因使諭蜀父老渴軫音之且至藹輿論以交欣恭惟
某官妙學家傳修能獨立善刀餘地無復三年之全牛

雋軌高馳幾空萬古之凡馬肆膺東擢歷上清華領袖
粉闈之羣英彌綸黃閣之餘議名高內外曰維山甫將
相之才家本西南更識孔明運餉之法是煩卿月之駕
來照屯雲之師嗟蠶絲保障豈老生之常談惟本末源
流有君子之大道况偃甲之益久不弛弓其奈何非至
明莫能灼變通之宜非至勇無以起因循之病顧賜環
之亟下知錦衣之難淹公蚤圖之民有望矣某強名閭
寄無取邊籌每惟形格勢禁之難徒有力小任重之歎

喜聞膚使來秉要權敢懷贈別之言仰致蒙成之請二人如左右手庶為茲土之祥一毫懷私吝心則豈吾徒之慮

回楊總領交馳啟

一時人物欽聞正始之音萬里江山得作皇華之使豈謂民財之分治而忘脉理之相關惟公可依使我知免恭惟某官海涵地負玉色金聲文章滿家真得長公少公之衣鉢道德名世何止左生右生之楷模昔如三鵬

之俱飛今歎一夔之獨步倦丹鉛之夜直懷錦綉之晝
游燕寢凝香田里爭歌於襦袴節旄照日山川盡入于
檐帷所臨有聲見器愈偉迺眷蠶叢之壤久困繭絲之
征譬如弓不弛而引其弦無亦毛可愛而反其裏孰司
軍餉能解帝憂簿領賢勞俾惠鄉國蓋凡本末源流之
故公實知之則夫父兄弟之思今其時矣竊仰九重
之善任想聞四牡之有功諭蜀文高應不起南夷之役
出師表在更當恢北定之規小訖外庸入觀大用某髮

雖種種意亦區區適叨制閩無實之名來視籌邊已成
之事所期四路之蒙福已卜二人之同心叱吏驅之何
敢避王陽九折之險及卿在彼庶幾成逸少一段之奇
懷所欲言書不能盡

賀張運使啟

易節疏恩驅車按部雖漕輓之權未殊於委寄而夔潼
之地相懸於重輕粵從詔下於九天想見民爭於二境
公今近止我亦歡然伏惟某官敏手幹時誠心利物飽

歷中外平觀險夷猗所臨之有聲宜見器之愈偉三巴
聚落已聞風采之澄清東蜀山川更俾皇華之照映豈
為高選式勸懋功不俟席溫且將環召某忝分憂顧自
省拙踈矧當一道游饑之餘寔有二人同心之賴高才
所了應不負禮樂光華之時遠慮何先當共洗岷峨悽
愴之氣

賀王運使再任啟

伏審明綸疏寵久任勸功緣蜀父老之心方歌廉叔之

五袴動漢天子之聽特借寇君之一年華節增輝列城
交慶恭惟某官器博大而凝厚識淵深而該通慨然懷
當今之憂卓乎出流俗之表肅將使指思廣帝恩絕憐
蠶叢之墟久困繭絲之政周爰咨度既自東而及西有
孚惠心專損上而益下遂令方一二千里之內頓能捐
三十萬計之輸自非厲冰壺之操以滌衆人脂膏之汚
懸水鑑之明以燭羣吏毫髮之隱酌盈虛而有制權通
變以無傷孰於期年辦此奇事仁聲歆艷褒詔煒煌有

臣若斯上固難於使代祝公勿去民有事於將來申即
舊儀實昭新渥某聞風自喜見日匪遐同寅協恭已灼
此心之不間愛人節用更知已事之可師贊美之勤編
摩莫究

回利路范運使啟

西州偉望孰踰太史之諸孫北闕英流得非天子之宰
士我當來於劔外公適使於漢中慨良覲之差池幸餘
光之照映伏惟某官學妙家法名高世科傳至和建策

之精忠存元祐愛君之誠意源流大肆華萼爭芳昔二
龍之長驅今一夔之獨步考冊書之筆削贊鼎席之彌
綸盍遂延登乃令勇去仗瀟湘之節人歌雋尹之平反
建梓潼之牙民賴陽公之撫字屬謀流馬之運又握軔
車之旌惟出入中外要以報君為心故遠近險易不復
擇地而處已聞宣室之渴見即慶追鋒之鼎來某志與
年衰才於用拙十行綸綍不容辭九折之行萬里風煙
將曷任三邊之寄已託同寅之助更惟規過之求干旄

何以告之竊有衛臣之願皇華言有光也諒同周雅之思

回成都王運使交馳啟

制閩虛名老不堪事計臺雅望賢足比民不辭萬里跣足之來為有二人同心之喜恭惟某官有匪君子為時聞人端倪開明蹈履芳潔孤立一意利劔耿耿無邪心泛應萬端游刃恢恢有餘地自結真主浸階顯途今吾西州得古膚使宣暢德澤變和遠情惟其正身率下而

知財貨之本末源流故能捐賦予民而消田里之歎息
愁恨藉甚絲綸之獎赫然禮樂之光某意亦區區髮今
種種適叨臨遣敢憚捫參歷井之勞仰體顧憂寔有臨
淵履冰之懼幸官聯之最密而治所之相依願推五善
之餘以為三益之貺侵人風露未審褰帷問俗之如何
入眼雲山已覺傾蓋論文之不遠

欽定四庫全書

燭湖集卷三

宋 孫應時 撰

啓二

回常熟姚知丞汝龍啓

日於交際嘗欣宿霧之披今也官聯似是德星之聚方
憂劇邑之難濟何幸贊公之得賢民其有依吾乃知免
恭惟某官風姿冰玉氣韻芝蘭擅家法之文章取世科
於談笑當年賈誼已驚漢庭之老生今日退之寧媿唐

人之博學栖枳未酬於夙志哦松又屑於此來鳳凰池
之判花會當溷子鴈鶩行之摘紙寧久負余某中年早
衰孤迹多懼終日了公家事未免兒癡一時皆君子寮
則有天相預倚英明之助決無可否之嫌白髮春風况
有板輿之共樂青燈夜雨尚兼樽酒之論文

回常熟傅知丞良啓

蜀江萬里不堪獨客之念親震澤一帆姑亦便家而為
養安能了公家事所恃有君子寮惠言先之此意厚矣

伏惟某官當今名勝後進楷模風流竹潤而蘭馨文字
日光而玉潔抱鈎深致遠之絕識有尊主庇民之盛心
再轉為丞雖未免負余之歎萬家之縣固已多及物之
功聲名甚都薦召非晚某日從遠役頓覺早衰極思自
放於白石清泉之間可能從事於盤根錯節之地而况
才薄力弱名微位卑獲乎上而甚難施於民而未信雖
區區之有意顧戛戛其奈何敢有腹心之言深求肘腋
之助涉筆占位公勿復為斯立之自嫌學道愛人我當不

辱言游之故里心之所願言亦奚殫

代邱帥回興元宇文尚書啓

井絡之墟勢雄南鄭文昌所鎮聲動西州云何至愚極
陋之資乃有聯事合治之幸敬先尺素庸寓寸衷恭惟
某官學貫皇王氣充宇宙胷羅列宿九精照曜於中宵
背負青天萬里扶搖而直上訂綿蕤之禮樂秩本兵之
簡書請行老上單于之庭歸贊中興天子之計左坳簪
筆畫承三接之溫西掖演綸夜直九霄之邃批勅擅名

於夕拜訓戎顯掌於夏官獻納論思莫非大慮人物風
采益尊本朝方當袞職之疇庸乃動錦鄉之高興厥維
劍北控在漢中大將登壇之檄用之席卷三秦丞相出
師之章於以震搖四海特煩君重久為上留已聞進律
之褒行奉賜環之召遂登端揆以正六符某並轡曲江
之游聯裾西府之掾仰龍門之鼎峻不使濶疎致駑駕
之推遷悉歸此賴孰知天幸亦使坤隅乃令平生肝膽
莫逆之交正在今日輔車相依之地用不辭於老鈍來

自託於聲威何以告之公勿替干旄之惠永為好也我
敢忘木瓜之心

代邱帥回襄陽張尚書啓

龍門出入飽天朝議論之餘駑駕推遷皆月旦品題之
及公適臨於荆雍我亦使於岷峨遂令肝膽莫逆之交得
在輔車相依之地端容老鈍密借聲光載惟廣漢綿竹
之間實乃大門桑梓之舊父兄故老有魏公賓客之典
刑子弟貴游知葵軒師友之源派矧鍾命世之傑有赫

前人之光故凡西州之搢紳悉歸東閣之領袖其所好
惡便爲重輕如某之愚於世何取匪恃素獎敢爲此行
伏惟某官心學對天血誠許國小卻夔龍之步武來追
羊杜之風流號令精明耕屯整暇兩京形勢已入胷中
之規畫三河豪傑習知節下之威名便應歸贊非常之
原遂可立定中興之業輕裘緩帶寧復久居此乎袞衣
繡裳此直分內事耳某既已叨蒙於歸遣亦思仰釋於
顧憂自度非才願安承教未敢與知功名之會姑欲講

求安集之方曷調人情以濟民瘼使得慰鄭鄉之望庶
不為漢節之羞江浦扁舟行可止瞿唐之險風煙累驛
無從覘峴首之游心之所期書不能盡

代邱帥回潼川閣侍郎謝到任啓

出綈疏恩建牙開府西清學士合歸日月之邊東道主
人暫作山川之重鄭鄉不遠蜀土增榮恭惟某官學海
老龍詞林威鳳琅篇寶字久照耀於人間道骨仙風早
翱翔於天上妙宣室雍容之對焯甘泉扈從之聯君恩

邳隆士論胥服當晉登於兩地忽勇退於急流授鉞登
壇撫漢川之陳迹輕裘緩帶還荆渚之勝遊高情何間
於險夷直道自孚於中外猶煩棨戟起鎮梓潼正爾笑
談轉春風於十縣行哉啓沃齊夜色於三階某舊託襟
期新聯官事脩燕雀之賀方道敝而未皇傳鴻鴈之書
愧詞高而難報式期會面以遂論心

代胡崇禮通交代徐提幹啓

棲遲蓬戶分欲長閒荏苒瓜時猥當往戍瞻在前之難

繼蹇將駕而自疑敢贄尺書以彰先敬恭惟某官金玉
凝粹蘭荃絜芳翰墨風流孰與東湖之嗣子典章文獻
尤多西府之異聞乃以中興之故家獨殿後來之諸彥
翱翔江漢俛仰歲年始從日甸之游爰贊星臺之畫搢
紳爲之驚歎廊廟稔於聞知厥今解組之期卽慶班朝
之渥某資材甚下門戶早衰亦惟升斗之所驅固甘瓦
礫之在後敢請告新之教俾無廢職之羞詩騷宗派之
傳雖非所及子孫盟好之重尚始自今

通交代朱宰啓

及瓜已近自憂善後之難行李未通是失告新之敬可
無先贄以請來期伏惟某官識察英明涵養深厚人門
奕奕早有聲乎諸公績用章章尤見器於造物頃更華
秩意有裏除猶屈長才少循近制厥維茲邑雖難治之
有年然在君侯則何施而不可盤錯敢櫻於利器氛祲
端避於德星望風采之遙臨覺山川之動色諒亦假途
於此便當躡次而遷某了無一長幾坐百謫平平手段

知有媿古人之風整整目前亦不爲後來之累計咫尺之相去固毫釐之必知公來勿遲我拱而俟簸揚久誤難逃糠粃之譏瑕類或多尚賴瑾瑜之掩春寒尚爾日用何如善保天和亟膺帝渥

上黃巖呂知縣啓

五世相家重見英賢之起一同侯社暫煩撫字之來身得趨承情知鼓舞恭惟某官質粹以厚氣閑且深風流藹然尚及前輩名聲藉甚見推一時踐揚茲多績用尤

著銀魚象簡當入位於朝廷墨綬銅章猶肯勞於州縣
載惟有宋之名族孰若東萊之一門申國大忠維持宗
社滎陽正學儀表搢紳子孫之昌簪紱無數鬱名德以
相望儼典刑其具存有如明公實對前烈而爲師帥肯
負國家斯邑驩然大幸有此必將訪吾民呻吟愁嘆之
故致天子哀矜惠養之仁正紀綱法度於絲棼紐解之
餘稽財貨源流於川竭谷虛之日換規模於官府還氣
象於江山用能慰千萬人之心俾復三十年之舊但恐

鵬程激浪立在九霄驥足乘霜難淹百里不容暖席即
有賜環某鞅掌徼巡憂危筮楚五斗之俸不繼已處淒
涼百謫之數且盈正須澄汰念平生之慕義喜一旦之
依仁公疾其驅我拱而俟既見君子庶幾寬忭愒之憂
善事上官不敢廢寅恭之義

上黃巖范知縣啓

四海名流夙仰相門之舊萬家和氣爭看令尹之新將
欽板以趨承實朔風而鼓舞恭惟某官世傳清白之操

天與英明之姿前輩典刑凜風猷之未遠朝家本末熟
文獻以相承淵乎器局之深藉其聲稱之重固已踐敷
州縣之久便當翱翔雲漢之間云胡未復於青氈而且
再紆於墨綬睠茲巖邑迫在瀛壖壯廬井之規模偉江
山之氣槩頃弊原之不剔紛事變以相遭曾歲華之幾
何而位權之屢易頽綱未整誰無大手之思珥筆猶多
肯受假王之鎮屬聞中命選畀賢侯方興來暮之歌欣
覩趣行之檄寒谷有陽春之望冥蟲知霹靂之威佇觀

措之於一朝立致風行於百里此豈獨吏民不世之幸
抑亦係朝廷用人之功第虞驥足之騰驤不復牛刀之
淹久某微官局束斗粟淒涼豈敢出位以蒙君子之譏
固嘗端拜而辭使者之命低徊累月怵迫萬端及茲望
履之期猶恨事賢之晚願公深念爲我遙驅弓矢秋風
請復徼巡之役弦歌永日行觀政化之成

通海陵司馬知縣儼啓

扁舟相命未忘越絕之山川雙舄飛來更共淮南之風

月託交雖舊爲隸則新可無緘辭敬候行李恭惟某官
器剛大而方重識疏明而該通其樂易真前輩之風其
豈弟有君子之道况以傳家藉甚滿世無之盖自聖賢
統紀之微已千六百歲雖如國朝文獻之盛凡數十巨
公卓乎天下之同稱莫如溫國之第一忠誠揭於世業
道義載於典刑遂令後人克對前烈瞻鴈序聯升之地
豈牛刀小試之時公雖為百姓而來勢不容三年之久
某智不諧俗仕真負承幸將日侍於弦歌得以躬承於

條教文書驚立自知無裨贊之功阡陌雉馴尚亟見循
良之效

回常熟交代葉知縣啓

治劇叵堪少幸林居之需暇告新何寵已復函書之鼎
來悵失計之難追託餘光而自慰恭惟某官人門具美
風采最高阮氏阿咸器青雲而獨秀謝家康樂庭玉樹
之相輝飽師友之淵源探詞華之根柢爲吏固其餘事
小試已有能聲藍田千竹之間雖種學績文之甚樂零

陵三亭之作蓋推能濟弊之莫辭從容談笑之餘洒落
塵埃之外規模井井而能辦善最章章而屢書優游三
年始終一日人所憚者公則易然乃知材用之絕殊何
等功名之不立某少學久落中年早衰已無宦情專爲
親屈憚淵明之遠役聊亦効公田之謀訪子游之故鄉
豈能事弦歌之語凜傳聞之可畏撫進退以自疑獨惟
繼賢者之蹤其必爲役人之地或容自勉汜可少安締
金石之交尚繼百年而未艾課瓊瑤之報徒慚一字之

不能心之相期言亦奚盡

上提舉李郎中啓

不善自謀謬當試劇適有天幸首獲事賢一郤一前且
榮且懼竊惟凡改秩而受縣所以更治民而考功本列
聖相傳之規在阜陵最惜此法厥或巧免適貽後艱顧
地有難易皆欲趨易而避難而闕有久近則亦善近而
惡久然匪序居于前列安能各遂于已私至取衆人之
所遺固非拙者之得已乃如常熟屬在東吳昔言游之

故鄉今天子之近甸謂亦壯邑偏蒙惡聲略計之二十年無一令之善去須入者累百數孰半辭之請行而某其班甚卑無地可擇輒抗聲而自丐覺環聽之大驚既而悔之則無及已待之過者或意其有辦治之實量之淺者則譏其爲苟且之貪不知本初出於無心殆亦數奇之有命然使稍獲乎上因得自竭其愚珥筆之民頗摧牙角之雄長鑿空之賦聽裁期會之閭疎小寬轡策許就規模雖居今之世決不能收兩漢循良之名而盡

已之心猶當勿負九重仁聖之澤且使三輔無棄其民
之地奚止一士免瘵厥官之憂前瞻星臺敬想風采欣
我公之可恃寫孤迹以自歸伏遇某官一代楷模多士
冠冕雖道骨仙風久步于金閨蘭臺之上而仁心德意
不忘於銅章墨綬之時乃出使之幾何適從公而自近
將倚諏謀詢度之廣入爲獻納論思之方冰鑑之明難
欺繡斧之威特重則凡奉法守公之吏是其畢智竭力
之秋敢自激昂遂忘冒昧伏望量其才而賜以進退之

命矜其情而略夫僭橫之誅廣厦萬間從此委身於大
比故園三徑尚當緩賦於歸來

上台守唐大著啓

恭審懷章入奏剖竹東來宣室乍前固喜賈生之見淮
揚不薄竟煩汲黯之行雖朝路之惜賢而海邦之知慶
恭惟某官清明內澈英達天成遠韻孤標落落塵埃之
外危言正色堂堂宇宙之間一從發軔於鸞栖已見持
身之山立妙文章之滿世赫聲譽於在朝非勁氣之不回

豈要途之難致頃謝著庭之直嘗紆守事之勞卓乎見
義而必爲深矣及民之實效猗去思之猶在炯公論而
可知惟其無愧忤於俯仰之中是以能從容於進退之
地即山林而嘯詠閱歲月以徘徊斷簡遺編更飽平生
之嗜好殘膏賸馥不妨後進之師承慰斯世之觀瞻增
羣公之稱嘆忽丹丘之催戍趨紫禁而得朝寸心雖簡
于上知千里猶勤於君重瞻此邦之瘠狹安舊政之循
良而公繼來斯民何幸料將先寬大以廣朝廷之德意

據法度以存州縣之紀綱詢土俗利害而酌其舉措之中稽財貨源流而分其緩急之要凡以維持靜密而紓四境之民命非必刻厲奮發以趨一時之事功嗟吏道之可從非公賢其誰望某服詩書於家訓師節義於古人惟其凡材淺學而未明大道之傳嘗欲躬耕灌園以畢其終身之願縈心親養俛首吏除憂危險之難全豈淒涼之敢嘆念從壯歲早服大名一瓣而爲南豐久云有志四方而逐東野每恨無從何幸會之能然遽趨承

之在此不獨旃幟之望實欣模範之依衛戟霜嚴儻獲
免曠官之罪鈴齋日永尚當蒙與進之温

上平江守鄭寺丞啓

恭審最績登聞明綸褒表陞華中祕易鎮雄藩公道日
開列城風動堯四岳之分治方深宵旰之憂漢三輔之
得人足爲京師之福江山改觀草木增春眇爲隸之方
新竊與民而相慶恭惟某官中和而英特剛正而疏通
本其天資之極高加以學力之獨到文字五千卷胸中

之氣浩然才名四十年天下之望久矣粵自鳴先六館
唾拾一科徼巡江湖嘯詠松竹收聲壯縣遙迹修門視
衆人摩肩爭進之途多明公袖手旁觀之日風波金石
要不隨萬物之奔流宗廟圭璋而獨無一毫之玷缺摺
紳推其舊德廊廟挹其清風方寢歷於高華聊迭均于
出入輒從省戶寵畀州麾美哉朞月報政之間卓然今
日諸道之冠是膺中詔改命大邦郵音一傳輿論交喜
敢以小夫之智妄量君子之心蓬山寓直寧異數之爲

榮燕寢凝香豈崇居之是樂惟明天子憂勞共理之意
與彼父老歡呼望賜之情想當五馬雙旌壓境之初便
有一襦五袴及民之惠則若寬條之布豈專下邑之私
惟是琴川之近封實爲弦歌之故里迴當昭代獨著惡
聲蓋以珥筆之民氣勢之日滋鑿空之賦文移之雨至
期會太嚴則才困於不展喜怒爲用則權輕而易搖故
二三十年以來幾無一令之善去在數百縣之闕久爲
兩選之所遺而基本無尺寸之長祇迫斗升之養謀不

能巧名又甚卑知擇地之無餘輒抗顏而自請銓曹環聽而大駭朋友交書而見譏尋雖悔而莫追蹇欲行而彌懼殆有天幸適逢我公伏望察其中心粗知勤事而愛民考其平日亦不違道以干譽未嘗恃書生之戇而敢乏公上之供但當始至之時未有可爲之地非稍寬於銜勒俾粗立於規模則恐掣其肘無以責其書之工揚其湯安得求其沸之止徒令茲邑之愈弊是亦大府之深憂所以控陳儻加識察益州即名方且歌宣布之

詩彭澤何心尚可緩歸來之賦有懷欣戴莫究編摩

答大寧柳教授啓

閱龍虎榜久矣爲同年生隔馬牛風邈焉無一日雅我
轉蓬於岷蜀公采藻於巴巫屬汭沂之往來重參差而
悵悵捧華絨之勤甚眷襟韻之藹然恭惟某官標衡嶽
之英受納湖之學靜而玩天下之理穆如有古人之風
固當顯聞明時振起斯道何舒遲而至此緬僻陋而與
居然而袖手閒吟飽風月江山之觀橫經坐講聆金石

絲竹之音猗所養之可知雖不諧其何愠世有公論天
豈困賢隨遇則安逢辰未晚其迂愚平素漫浪獨游幕
府十旬頓辜黃卷之味庭闈萬里久切白雲之思未嘗
計已之窮通豈足繫人之輕重竊相期之不淺遂盡意
於此言尚須歸棹之問津或幾班荆而握手

通某教授啓

二千石之賓師名流所處數百戶之令長俗狀可憎載
行李以驅馳歌采芹而慕歎恭惟某官學富千載文鳴

一時焜耀曲江之雋躔雍容泮水之講席方且紬繹道
妙發揮聖傳明明範模藹藹觀聽坐令山川草木之生
氣如聞金石絲竹之古音少須詔書亟寘冊府某久爲
小吏本亦諸生不善謀身無端求邑猶思抗志埃壘之
外或可讀書松竹之林頗容函丈之徜徉稍陶方寸之
紆鬱天下善士故應交際之有時我輩中人便想風期
之不淺

與江陰教授啓

學未優而入仕深自媿於古人道相同而爲謀竊願交
於君子敢以微巡之陋託于俎豆之間恭惟某官天資
英明學力深厚理博而造於約才高而持以謙聖處工
夫接諸儒於布武筆端游戲收一第於摘髭薄煩師道
之尊來作侯邦之重餘波沾丐多士蔚興諒方諸公推
轂之時此豈君侯暖席之地某愚未聞道用非適時安
能自拔於尋常聊亦強謀於升斗茲爲親而奉檄將斂
袂以趨風幸因槐市之追隨復奉芹宮之色笑雖投身筆

楚難瞻地位之清高然側耳弦歌自冀塵埃之蕩滌有
懷欣係莫罄形容

答泰州顧教授啓

恭審整棹吳溪問途淮浦姓名焜耀夙高當世之儒先
冠劍尊嚴來作諸侯之師氏披雲有便指日以須伏惟某
官淵源六經斧藻羣物上林長揚之賦傳誦四方昌黎
河東之文步趨千載加以器度寬雅襟懷坦夷典刑及
於老成行義信於朋友太學六館喜何蕃之成功博士

諸生望平津之驟貴胡一官之尚冷方千里之來游東
序弦歌雖樂橫經之多暇西清顧問終期飛詔之九遷
某越嶠寒生虞庠後學剝聞餘韻沾被殘膏悵遐迹之
參辰耿深衷之歲月願容傾蓋請遂執鞭幸公事之無
多望庭除之不遠苦無松竹可留客以對哦惟詠藻芹
得從公而共樂

回真州孫解元啓

棘闈論士此後世之至公天府得賢自明時之美事屬

當選試之責非有薦揚之私偶然相逢何足爲謝某人
秀出州里名聞江淮兩嘗得雋於先登今欲成功於三
戰談經浩博擅老成之波瀾對策焯煌駭兒童於雷電
竊喜登名之日幸逃失士之譏方將觀首奏於南宮聽
臚傳於北闕一第正復溷子亦何足云六經故不誤人
當行所學風期不淺晤語末由惟深涵養之功以對亨
嘉之會